

重校
箋註

錢牧齋全集

三

有學集卷三十四

牧齋全集第二種

神道碑

虞山

錢謙益

牧齋

撰

明故光祿大夫太子太保禮部尙書兼文淵閣大學士贈少保諡文穆成
公神道碑

嗚呼以天爲無意於人國乎雖其陽九百六方蹶降割之際光岳之氣未嘗不
合也山川之雲未嘗不出也扶危定傾之才未嘗絕跡于世謀王斷國之人未
嘗不接踵于朝也以天爲有意于人國乎畀之以賢才而斬之以信用使之臣
不遇其君君不遇其臣即君與臣兩相遇矣而又不得久于是乎奸邪小人盤
互于內敵國外患交蹙于外而淪胥板蕩忽焉不可救藥蓋吾觀宋事至靖康
諸賢之進退輒爲之填胸拊膺且憤且慄今老病垂死而書吾友文穆公墓隧
之碑乃在其卽世二十餘年之後此所以忍淚執筆嘆窮而繼之以泣也公姓

成氏諱基命字靖之避廟諱請以字行大名人也少爲諸生長身玉立與高陽孫文正公齊名萬曆丁未舉進士選庶吉士踵高陽列詞館砥行績學並著公望廻翔詹翰歷官吏部左侍郎崇禎元年枚卜閣臣廷推居首未果用踰年遘永陷沒畿輔震驚上用廷議十一月七日即家起高陽公以樞輔駐通州控御神京次日趣召公升禮部尙書入閣辦事越五日高陽入朝召見平臺公颺言于上曰願陛下以戰守事宜一切委承宗俾得盡其才力必能辦敵仰副聖意上爲之首肯當是時烽火連接警報錯互舉朝恒駭不知所爲公言出而聖意定廟算一人有固志上始悔用公晚也高陽旣出鎮公在政地無一日不以關門爲慮凡所條上覆奏綜覈舉行於兵部則謂四方召兵抵圻輒烏集獸散當止七萃乘城之士宵旦不得下當更番宣雲勁卒入衛當額招備所當敵于戶部則謂調集費繁額賦當急行糧當覈新餉當增凍糧當運明年領兌續運之法當行于工部則謂收法辦造當稽內造外造當促期戰車當補料價當先期

以應又謂六垣註銷不講六曹奏報省試不聞錯互挨次緣飾故事一一條次當興幾何當革幾何心計目營手批口荅爬搔拮据冒勞銜怨皆以內庀軍國外應疆圉爲張皇修攘之計而其最大者則處置關帥一事蓋是時馬帥世龍出自囹圄受命總理方扼腕奮臂期却敵自效中樞惡其兀傲不善事己也使其私人監伺之又嗾他帥譁而訟之公謂國家所倚賴者關門也關門所倚賴者高陽也今以私憾齟齬世龍掣高陽之手足而責其展布關門之事去矣猶不爲國家慮乎于是力排羣喙取旨申飭命世龍一意進取不得輕議更置又請遣科臣往薊飭厲羣帥不得擁兵觀望違總理節制世龍益感奮誓死總五大帥從高陽下灣遷次第復遵永四日而四城皆下露布上聞獻俘告廟本公在政地周慮危疆主張國論居中調護之力也公感上知遇班在二人之下垂齒樹頰無所鯁避及居首慷慨擔荷益自發抒嘗痛哭爲上言敵警爲二百年未有幸其薨退因循苟安萬一控絃復起仍前搶攘天下事寧堪再誤上感動

命擬勅申諭公一夕草四諭漏下三鼓猶在直上從午門望內閣燈火熒熒然
屏營歎息不能成寢也灤水師期來告天大雨歸步中庭竟夕不寐家人環視
不敢問質明捷書至乃大喜語其故公雖在禁近心環竹山灤水間蓋大臣心
事如此公以辦敵無能敵退乞罷疏三上溫旨慰留叙功加太子太保廕一子
中書舍人上深念官常國紀敝竄日甚不大斷割無以振積玩雪國恥公謂治
道去太甚求治戒太銳天威震疊鐫責切至引理据法多所寬解上時時曲意
報可一二僉壬營進者爭爲操切可喜逢迎上意流言布聞謂公委卸市德上
意雖專注不能無動而郎署之宵人緹騎之惡子乘間抵隙交章詆公公自是
奉身退矣公旣去高陽在關門益孤分兵易將曲肆撓阻比三年以凌河之役
去高陽去而關門之事不可爲矣自時厥後國勢益蹙上心益困登拜如踐更
罷免如傳置蝸蟻沸羹無復典要譬之駕萬斛之舟衝風逆浪檣傾楫摧長年
三老袖手屏去而開船捩舵之人叫號喧騰促數更易其不至于覆溺者鮮矣

然則國家之不早用公也公之用未久而去去未久而亡也天而有意于人國夫寧若是葉落而知秋壺冰而戒寒公之進退關係于國家綦重而世罕有早知之者也天啓間公與予並官右坊逆奄魏忠賢用事南樂諸人附之引繩批根將興大獄兩人私語咋指嘆詫一日語余昨與南樂飲酒酣拊余背身後願以易名累公余漫應公尙計及易名氏耶醉而失言南樂目我矣余笑曰公未醉時向南樂作語云何次公醒而狂何必酒也余先罷公以少詹事乞掌南翰入賀畢亦罷已偕起田間朝罷過從相與屈指四郊多壘君父旰食網疎事叢何若而可畫灰借籌每坐談輒移日旣而曰昔人有言政將及子交相勗也閣訟之興也余旣被放公亦胥後命過余而嘆曰公又去也其誰出而圖吾君乎余曰公在吾何憂公曰不然吾兩人車兩輪也吾兩人用高陽必將出鼎三足也車一輪有不契需者乎鼎兩足有不覆餗者乎公姑去矣他日當思吾言耳余歸一年所公與高陽相繼枋用用未竟而皆去余嘗與高陽促席及之停杯

浩嘆以公爲知言也當余之被放而公亦在北也朝右之倚公者以抱蔓爲憂及公之登用功見而言立也朝右之惜余者或以得輿爲喜公旣不久中書余遂長錮黨籍於是海內正人君子扼腕世道者碩果之望滋窮井渫之心彌惻矣馴至于今國家之陵谷變遷宵小之骨肉腐朽世有讀公豐碑考吾兩人之遺跡追歎其邪許推挽嬋媛响沫之情事截截之口能無重恨于謊言夢夢之天抑或纏悲于殄瘁清濁同流玉石俱燼世運而往矣天不可問矣斯予所爲忍淚執筆嘆窮而繼之以泣也公乞歸凡六年以乙酉八月卒于家櫛沐草遺疏正襟危坐而逝上震悼恩卹特隆仍予贈諡以某年某月大葬于某地之阡葬後之某年余與公之子今翰林學士克鞏相見于長安絮語舊事相對啜泣再拜稽顙以麗牲之碑爲請余謹撰次公秉政當國二百七十日間訐謫名畫關于危急存亡之大計者大書隧道徵信國史其他詞林閱歷之次綸扉奏對之詳與夫砥行載德劬躬燾後之本末已見于高陽之家傳故不具書銘曰幽

都祝栗戴斗崆峒光岳氣合篤生俊雄騰蹕藝林洊歷史館玉琢金相漆書銀
管握文椽筆橫經細旃淵停山峙風節凜然方囂帝博未省天醉駕鵝雙飛威
鳳隻逝公曰吁哉主憂臣辱誓捐身圖以謀國蹙馬飲灤河火達甘泉艱危受
命促數登延公入颺言聖明天保請以戎索付彼元老神京重地重關堵墻如
微周廬如閨扈堂蒐討軍實擁護節鎮身直密勿心履行陣露布宵馳日畿晝
闕帝曰念哉頭鬚如白蹇蹇勞臣中外鈎鎖關門烽燧閣門燈火外憂蹙弭內
間遞作雄鳴雌和骨銷金鑠公笑移疾角巾襍被敵入我入敵退我退比及大
歸憂心耿耿管戒用豎沈遺城郢輟哭有數班劍加崇煌煌錫命賁此幽宮滄
海蕩蕩窮塵悠悠玉盃旣出銀海不流展如公墳堂斧截嶺松楸鬱芊芊馬行
列有美象賢接武奎璧斯石徵文大書深刻公神在天在帝左右驂乘高陽受
命三后雲車霓旌來游來觀覩此立石嘻其永嘆

都察院左都御史贈特進光祿大夫柱國太保吏部尙書諡忠文李公神

道碑

嗚呼我神宗顯皇帝丕承謨烈久道化成制科取士人物滋茂享國三十有二年至萬曆甲辰一舉而得二人曰樞輔高陽孫公御史大夫吉水李公崇禎己巳孫公再出督師收復遵永六城以報天子戊寅冬高陽陷公闔門死之又六年而有甲申三月十九之事文臣殉難者十有二人而李公爲首公諱邦華字孟闇懋明其別號也年三十一舉進士授涇縣知縣庚戌行取授山東道監察御史巡按浙江丁巳坐年例調外熹宗即位起兵備副使分守易州明年入爲光祿寺少卿擢都察院右僉都御史巡撫天津明年召爲兵部右侍郎移疾去削奪爲民先帝御極起工部右侍郎改兵部協理京營戎政進本部尙書在事一年用中旨罷歸公起家爲令精彊堅密通曉吏事憤京營積蠹盤互奮欲爬搔鉤剔報稱任使中人勢要惡其害己蜚謀鉤謗煽動宮府上心知其公忠而怵于衆人之欲殺之也謀姑去公以塞衆心而需後用公急公任事累奉諭旨

乃以顧恤廢弛得罷蓋反詞鐫責以明不欲去公之微旨上英明喜斷疑信衆互爲羣小所脅持惜未有以孝廟任劉忠宣故事爲上痛言之者也公旣去營務益不可問經筵顧問李邦華做許多實事嘆息久之己卯特簡起南京兵部尙書叅贊機務踰年丁父憂壬午服除起南京都察院右都御使未幾拜北掌院左都御史公初奉南院命以眞袁眞老固辭俄聞北兵躡內地奮袂嘆曰此豈臣子辭官日也爲文以告大江之神誓墓訣子孫而出抵湖口得後命便宜發餉遏寧南侯左良玉潰兵上聞之大喜益專意委信公公朝見論職掌事上曰久待卿歸來酌議潰兵事處置得宜東南半壁賴卿無恙跪奏移時數詔起立溫語如家人父子中官皆屏息遠伏莫敢陝轡傍睨每召對百官如墻而立上視歸乎公遣中使視病賜猪羊酒米瓜果視諸輔臣有差蓋上之倚公深矣當是時外侮內訌人主子立軍國之積弊臣下之錮習如盤根之不可拔如棼絲之不可治如壞屋漏舟之不可撐柱狡獪之掾人狙伺于內庸惡之閣員獮

噬于外勲臣小臣躁妄無藉者胥口岐舌依草附木簸弄于中外之交公于上言無不盡然心有餘于言甘苦自茹心盡而言不獲盡者有之先帝于公言聽無不從然從有餘于聽心耳交蹠聽從而心不克從者有之君臣之間唇焦口呿涕淚覆面警急擣胸卒亦無可奈何而以一死爲結局國蹙君傷神焦鬼爛殆有劫運促數乘除而非人之所能爲也甲申三月賊破潼關上召見羣臣泣數行下公退熏浴具疏請下明詔勵臣民死守用成祖朝仁宗皇帝監國故事急遣皇太子監國南京越數日又請命定永二王分封江南先帝袖分疏遶殿巡行且讀且嘆疏藁啣袖袖已覆出紙牘漫爛猶不去手密諭閣臣陳演憲臣言是演頗洩其語旣而羣臣爭疏南遷臺臣爭言詆譎上恚且恨公二疏并閣不行上與公自此皆只辦一死但不言耳三月十二日大同昌平繼陷公亟議登埤死守走告內閣閣臣魏藻德故曳踵徐徐出漫應曰且姑待公唾之而出明日率諸御史登城城璫拒守者矢石交下慟哭而返十八日賊破外城移宿

吉安館文信公祠下烹賜豕祀信公徧餉所知詰朝內城陷奔赴大內闕門堅
閉不可撼歸館沐浴整衣冠北面再拜三揖信公曰邦華鄉邦後學合死國難
請從先生于九京矣取白縑書贊繫腰間曰堂堂丈夫聖賢爲徒忠孝大節誓
死靡渝臨危受命庶無愧吾君恩莫報鑒此痴愚縑尾書人生自古誰無死留
取丹心照汗青之句囑家人謹護總憲印繳還朝廷勿汙賊手勿殮吾屍須待
得主上下落移席正直持束帛繫信公坐楣投繯而絕三月十九日辰時也正
尸于中堂眉目軒舉如生時賊過咸咋指呼忠臣忠臣越三日乃殮從梓宮遵
遺囑也昔者有唐開元房琯畫詔而分藩有宋靖康李綱抗議于決戰公忠謨
偉畧不下二公救亡圖存綽有成算先帝識路自迷操刀不割却國醫而待盡
仰毒藥以趣亡遂使次律拱手伯紀結舌死賊舒拊膺之慮雜種快脫帽之謀
廟社淪胥主臣同盡納肝無救于衛滅藏血何補于周危窮塵終古寧不恫乎
有餘痛哉公當危急存亡之秋建立大計通經權兼戰守深謀遠慮不敢以九

廟大義六飛重寄輕試一擲密疏具在可覆案也公疏畧言臣去年入都即請
勅畿輔郡縣預備城守秦督宜扼關自守固勿輕擲浪戰宜遣重臣督師防河
諸臣泄泄不省以致百二山河河決魚爛都城堵牆一無可恃恃京營則刳敝
垂盡臣向者勾稽清覈去任十五六年盡付流水矣恃援兵則江浙搖動荆襄
糜爛鞭長不及馬腹矣恃積財則天子持鉢健兒脫巾京師無兩月糧矣爲今
之計皇上惟有堅持効死勿去之意爲中國主則當守中國爲兆民主則當守
兆民爲陵廟主則當守陵廟周平宋高之陋計非所宜聞東南曠遠賊鋒滋蔓
齊魯南北聲息中斷神京孤注變起不測竊見東宮皇太子天資英武豫教端
凝正宜歷試艱難躬親戎器請亟倣仁廟故事撫軍陪京即日臨遣欽簡親臣
大臣忠誠勇智者專勅輔導便宜行事刻期僨水陸飛輓集方州義師以鞏燕
雲遏寇氛此宗社安危所係不容頃刻緩者賊兵驕師老急檄關寧吳三桂提
師迎擊可以必勝勅襄城伯李國禎悉簡京營精銳出爲犄角守城之事臣等

力任之皇上下詔罪己悉發內帑蓄積以餉戰士勿局縮爲盜守逆賊之首未必不可懸藁街也推公之意以爲主上決計固守六軍萬騎儼若磐石賊雖狂狡不敢越京城而南皇太子可以按轡徐行無道路之警緩則收拾東南全局以強幹枝急則號召燕齊援師以捍頭目此誠所謂經權戰守萬全之策也假令輕舉妄動倉皇播遷萬乘六宮一離闕庭賊輕騎躡我重兵躡我逆戰則不能引退則無及賊偪于前援絕于後羣臣從騎鳥獸奔竄人主將安之乎又令主上行幸太子居守長君共主輕車潛遁而以撫軍監國之虛名委東朝于虎口雖至愚者不爲而先帝肯出此乎公于此籌之熟矣請死守所以力杜播遷之謀請監國所以全收固守之局又曰皇上謂臣南人借此自便臣老身許國卽以南事委臣臣必不敢任此則灼知定遷無策人圖自便恐有王欽若請幸江南陳堯叟請幸蜀之疑而逆折其機牙也陵谷遷移記注蕪沒郢書燕說附耳射聲小生謾聞冒昧執簡謂公亦唱議南遷以賊臣劫制而罷豈不諄哉以

先帝之神明不深維唐室元子北畧諸王分鎮之制詞俾公之老謀石畫與蠮
蟾沸羹之徒同類而共置之國家存亡大故實係于此今也不知國故不察事
端附和南遷者徒云援公爲口實而不悉其所以然痛恨誤國者但執阻公爲
罪狀而未悉其所以不然螽蝗醜奮茅鴟狂呼使元臣鉅公之心事晦昧千古
此可爲痛哭者也公生而孝友順祥篤誠明允淵停山立不苟訾笑謂儒者當
如范希文做秀才時便以天下爲己任講實學峙實用辦實心幹實事時俗方
標榜門戶徵逐聲利以爲土龍沐猴非所以自樹立視之蔑如也令涇下車未
幾閭里銖兩之奸皆通知之不事芒刃漸摩教化簪筆舞文之俗犁然一變集
父老詢問風俗家產貧富給筆扎籍記戊申歲大祲勸貸賑濟按籍差次斗石
圭撮若算勾股全活者六萬人立社倉濬水利清劇盜戢亡命至今奉爲絜令
在西臺風裁凜然所條上皆軍國大事所排竿皆城社巨奸危詞苦口磨切政
府首輔福清葉公下朝房秉燭照公面曰不知李懋明眉眼何似敢言乃爾福

王之國有日請給養贍田土務足四萬頃而後行戶部戶科噤不敢言公曰若是則之國無日矣乃手草疏數千言爭之甚力刑部諱沈應奎老人負直節持公疏詣福清西臺有人東閣可默默而已乎福清乃上疏極言貴妃兄國泰奏繼入事得寢福王遂以甲寅三月就國福清所以能轉移聖聽奠安儲位者實借助于外庭公當其衝應奎贊其決也兩淞地繁政劇採訪利病分六曹爲六書某利當舉某害當革條分件繫每按部舉而措之有餘地焉謂巡方以察吏爲要察吏以獎廉懲貧爲要直指供億有贓罰公費二項贓罰坐派郡邑公費取盈協濟公歎曰繡衣使者表率百城可以身爲谿壑乎亟下檄蠲除屬吏凜然負霜不待望風解印綬矣歲當慮囚積案填委夜闌炳燭亭疑閱實運筆如風平反者百餘條老文法吏莫敢出入一字廷獻之日獄囚盈庭舊使者省覽累日爲手板以記事公獨不用攜冊坐輿中流觀閭記數百人以次決遣姓名訟牒不遺毫髮吏民大驚以爲神其鎮天津也兵出東方節下空虛蒞任方一

日妖賊陷景州公飛騎檄東師返旆蹙賊于前復選步曲十人潛師躡賊後各戒以道里時日分道趨賊而不使相聞比合戰兩軍各至信地背賊兵而夾攻之賊惶惑不知所爲遂大敗俘斬四千有奇一戰克景武再戰克鄒滕蓮妖殲焉是役也公不用大舉而用鷗勦以爲大舉則徵兵轉餉情形張皇賊烏舉獸駭以老弱遺我而走險以老我賊未可盡也彼瞰我東師已出我仍以東師蹙之所以伐其謀而奪其氣也分遣我師各戰其地而不使相聞使之人自爲戰各出死力于兵法爲與之絕地也旣而眞督撫攘其功得金吾世職公進俸一級蓋當時疆事類若此朝鮮援兵潰還索餉呼囂洵公方以恩信結邊士心乃呼其將而數之曰鮮軍例支餉廣寧廣寧失支餉山海汝縱潰兵棄信地而索餉于我欲何爲乎念此軍嚴冬渡海裂膚墮指暴露良苦給汝餉百石再行糧道措處汝率先摩勵出汛爲汝寬一面之網不然立斬汝矣逃將搏鰲流血八百人感泣歸伍讙聲如雷遣人皆踴躍思効命矣遼瀋新陷風鶴震驚行間